

## **Helena Cavegn, Sedrun**



Suenter liunga e dolorusa malsogna ei Helena Cavegn spartida da quest mund igl emprem da mars 1996 ella vegliadetgna da mo 48 onns. La Leni, sco ella vegneva numnada ei naschida ils 2 d'uost 1948 a Sedrun sco feglia da Placi Cavegn e Victoria, naschida Deragisch. Ensemes cun ses sis fargliuns ha ella passentau ina affonza segiramein biala, ventireivla e varionta.

Suenter la frequentaziun dallas scolas da vischnaunca sedecida ella per igl emprendissadi da vendidra. Ella lavura era en plirs menaschis d'ustria ella Bassa ed en la patria.

Igl onn 1972 daventa ella mumma d' in fegl. Aschia han lavur e quitau buca muncau alla Leni dad educar e trer si il fegl Daniel.

Pli tard ha ella luvrau plirs onns sco amicabla e simpatica vendidra tier la pasternaria Schmid. Quella plazza ha ella midau cun serender en la fabrica Smart a Sedrun. Quella ha denton stuiu serrar las portas aschia che la Leni ei daventada senza lavur. Denton eis ella restada a casa ed ha giu fetg bien quitau dalla mumma.

Avon biabein in onn e miez ei ina nauscha e maligna malsogna s' annunziada. Ina greva crusch per ina giuvna dunna. Ella che ha giu da semudergiar bein enqualga en sia veta ha stuiu serender pliras gadas el spital. Cun energia singulara ha ella battiu cun tutta forza encunter la malsogna. La speranza da vegnir sauna ha ella maina piars. Mo il Segner che ha era accumpaignau ella duront quei spazi dalla veta ha vuliu auter. Igl emprem da mars ha el clamaeu ella a casa tier el. Ella ha fatg lartg en famiglia, lartg a nus tut; ina persuna legra ed amicabla maunca. Ina baselgiuna vischinas e vischins han accumpaignau la Leni sin siu davos viadi terrester. Ella ruaussa ussa en la pasch beinmeritada.